

## Is Fogadonis de Sant'Antoni



Sant'Antoni est calau a s'inferru po ndi furai una cincidda po dd'arregalai a s'Umanidadi. Est una paristoria, ma de sa noti de is tempus si torrat gràtzias a su santu po custu arregalu de vida, alluendi in onori suu is fogadonis a mericeddu de su 16 de gennàrgiu: sa genti ponit a ingiru e ònnia comunidadi inghitzat su rituali suu.

In calincuna bidda su ritu si torrat a fai a merì de su 20 gennàrgiu po Santu Bustianu.

Is fogus cumbidant sa genti a baddai, a s'inghitzu abellu abellu, e apustis sa festa si fait sèmpiri prus allirga, cun sa mùsica de is launeddas o de su sonetu chi acumoangiat ballus e cantus, si cumbidat su binu e sa cosa de papai a is istràngius: faa cun lardu, drucis cun saba, cun meli o cun mèndula.

Custus acontessimentus si faint ònnia annu, ca portant bona sorti po s'annu chi benit.

Su nòmini de is fogus mudat de logu a logu. In sa Barbàgia e Ogiasta ddi nant sos focos, in àteras biddas de Sardigna ddi nant sas tuvas. Anca de nosu ddi nant fogadonis.